

radicalibus, caulibus scapiformibus simplicibus vel rariùs supernè bifurcis foliis subsesquilongioribus parcè setaceo-squamulosis sub capitulo incrassatis, involucri phyllis ab exterioribus patulis ad intima sensim auctis omnibus longè setaceo-acuminatis undiquè pilis densis brevibus furcatis obsitis, ligulis concoloribus tubo longioribus, acheniis cylindricis supernè subattenuatis aculeolatis pappo albo eis subbreviori terminatis, pappi setis omnibus a basi plumosis exterioribus brevioribus.

L. biscutellæfolium in pl. Heldr. Anat. 1846. non. DC.

Hab. in rupestribus Pisidiæ propè *Tcheltickchi*, Maio. (Heldr.)

Folia cum petiolo 8-9 poll. longa 6-9 lin. lata, scapi 12-14 pollicares, capitula magnitudinis eorum *L. asperi*. Affine *L. Græco* et *aspero* facillè distinguitur foliis elongatis breviter et remotè dentatis et imprimis involucri phyllis longè et tenuissimè acuminatis.

LEONTODON DIVARICATUM Boiss.

L. perenne totum indumento densissimo pilis apice stellatis constanti canum pannosum asperulum, caulibus flexuosis a basi 2-4 ramos edentibus ad dichotomias foliosis, ramis divaricatis flexuosis monocephalis parcè et brevissimè squamosis sub capitulo incrassatis et valdè asperis, foliis lanceolatis inferioribus in petiolum attenuatis remotissimè et acutè 2-3 dentatis caulinis integris, involucri phyllis pilis stellatis inordinatim asperulis adpressiusculis ab infimis brevibus ad intima lanceolato-linearibus sensim elongatis, ligulis concoloribus basi pilosis tubo subæquilongis, acheniis apice subattenuatis muriculatis pappo albo eis sublongiori terminatis, setis pappi omnibus a basi plumosis.

Hab. in Tauro *Ciliciæ* Kotschy, N° 324.

Cæspitosum? Caules subpedales, rami 4-5 poll. longi, folia inferiora semipedalia 5-6 lin. lata, capitulum magnit. ejus *L. asperi*. Species a præcedentibus distincta indumento densiori pannoso, caulis ramosi ramis divaricatis, acheniis abbreviatis. — Species *Leantodontis* hîc descriptæ characteribus forsân nimis lævibus distinguuntur, sed æquo jure ac plurimæ generis naturalissimi admittendæ sunt donec saltem observationes posteriores inter eas intermedia occurrere nos docuerint.

SCORZONERA MULTISCAPA Boiss. (Sect. *Euscorzoneræ*.)

Sc. radice fusiformi verticali, collo nudo, foliis omnibus radicalibus

brevissimè intertexto—puberulis pulverulento—canescentibus angustè linearibus gramineis flexuosis canaliculatis integerrimis inferioribus nonnullis sæpè margine crispulis apice subrevolutis, scapis numerosis canescentibus monocephalis erectis folia paulò superantibus, involucri puberuli phyllis paucis latis adpressis angustè albo-marginatis infimis triangulari—ovatis cæteris lanceolatis omnibus obtusiusculis, ligulis purpureis striatis involucre dimidiò brevioribus, acheniis basi dilatata angulatis supernè cylindricis sub lente parcè scabridis, pappo sordido achenia subæquanti.

Hab. in collibus circà *Rascheya* Antilibani Maio. (Boiss.)

Folia 6-8 poll. longa 1-2 lin. lata, scapi 8-9 pollicares, capitula minor et breviora illis *Sc. roseæ* cui affinis est et quæ differt radice collo filamentoso, foliis glabris planis elevatim nec obsolete nervosis, involucri phyllis attenuato—acuminatis, acheniis striatis.

Var. β . *compacta*. — Folia abbreviata patula 1-2 poll. longa in cæspitem compactum aggregata inferiora sæpè oblonga linearia. Scapi 4-5 pollic.

Hab. in cultis excelsis Libani in viâ inter *Beyrout* et *Damascus*.

Habitus diversus sed characteres capitulorum et acheniorum omninò speciei.

SCORZONERA CALYCVLATA Boiss. in Kostch. pl. Pers. bor. 1846. (Sect. *Euscorzoneræ*.)

Sc. radice fusiformi, collo petiolis vetustis densè squamoso, foliis pilis brevissimis ramosis sub lente hirtulis viridibus radicalibus et caulinis inferioribus angustè lineari—lanceolatis irregulariter incisissimis longè acuminatis laciniis triangulari—lanceolatis acutis, foliis caulinis intermediis et summis paucis linearibus parcè denticulatis basi rotundatis, caulibus ascendentibus teretibus glabris totâ longitudine ramis remotis brevibus auctis 2-4 cephalis, capitulis pedunculo eis breviori suffultis, involucri ovati glabri phyllis inferioribus cæteris dimidiò brevioribus lutescentibus ovatis vel oblongis obtusis interioribus virescentibus oblongo—ellipticis angustè albomarginatis, ligulis luteis extus rubellis involucre sesquialongioribus, acheniis...

Hab. in monte *Demawend* alt. 6000'. Kotschy N° 344 A.

Folia majora 5 poll. longa 6-9 lin. lata, caules pedales. Valdè affinis *Sc. incisæ* DC. quæ tantum differt foliis caulinis majoribus basi am-